

30 Jahr lang dommi Spröch ond 30 Jahr glatti Helge
30 Jahr scho gets s`Komedi-Team eus haut nüt os de Felge
ond apropoz 30 Jahr s`schlimmscht Zenario wo mer vorschwebt
das de Isprächer vom Stadion z`Aarau au so lang dorehebt

Wo der Papagei Thiel ond de Pit Bull Schawinski em Fernseh ufrätte send
hani dänkt jetzt gohts de nömm lang und die Zwe nähme sech am Grend
jo wenns Schwyzer Fernseh of dem Niveau e Zuekonft sett witterfahre
den chasches mache wed Susan Hochueli und der d`Billagebühre spaare

E Frau schrieht enere Kontaktazeig ganz eifach und banal
ich sueche en Maa meteme Rossschwanz d`Frisur die esch egal
s`erscht Agebot wo ofs Händy chonnt du das esch de Knüller
do schomol es Foti us mim Büro Absänder Geri Müller

Nur ein Gegner müemer jetzt no schlo ond den lacht för eus d`Sonne
jo ond eusi Region het s`Renne om der Atommüll gwonne
do seit ein vo dene paar Nase z`Brugg wo vor em Ensi düend demonstriere
chomm do semmer nüm erwünscht mer düend en Bözbärg ue disloziere

Ar Fuessball-Wm z`Brasilie send d`Schiedsrechter neuerdengs met eme Spray presänt
damet be me Freystoss d`Spieler vor Muur emmer gnue Abstand händ
jo sone Spray wämmer jetzt au het d`Chelepfleg z`Umike bestemmt
damet eusi Frau Pfarrer vo de Chele gnue Abstand nemmt

Ond jetzt do a dere Stell no ne leidigi Gschecht
also wenn ich ehrlich be ehr send doch ned ganz decht
nä nei ich rede do ned vo euch ich well jo schliessli kei Krach
ich rede do vom Waldhusbronne ond vom Friedhofsdach

Bem Gmeihus ond händs em Novämber e grossi Tanne gfällt
händ`si züglet of de Bronneplatz ond det als Wiehnachtsbaum ufgstellt
ber Yweyg strahl`si e neuem Glanz s`ganz Dorf duet applaudiere
ossert die vom Underdorf wo nömm chönd telefoniere.

En Bruch en Bruch en Bruch en Bruch en Bruch ond nomol eine
en Bruch en Bruch en Bruch en Bruch langsam werds läschtig so wörd ich meine
en Bruch en Bruch en Bruch en Bruch en Bruch das nemmt keis Aend
i ha gar ned gwösst das mer z`Rinike sovel Wasserleitige händ
Ond damet mer en Zuekonft au genau weiss wo sone Leitigsbroch äxistiert
het mer jetzt be eus em Dorf neu Strosseschelder montiert

S`letschi Jahr afangs Septämber do esch es passiert
de 1500i Ihwohner het sech z`Rinike iquartiert
of de Gmei unde händ si soumässig de Plausch ab dem Jubiläumsbörger
well es esch es chlieses Chend ond kein Sozialhilfebezöger

Ond zum Schloss do wet ich mech no vor de Liselotte verneige
well Sie duet hüür scho zum zwänzigschte mol eusi Helge zeige
also au das Jubiläum muess gfiered si das han ich mer gschwore
ich hoffe dromm er heiged scho all eues s`Portmonee devore

*Der Komedi*⁴⁵

Wänd er me bsueche? Ich be dehei onder „www.komedi.ch“

Ps: De Zeddel met de Wettbewärbsvärse fendet er of eusere Website „www.komedi.ch“. Det chönd er en denn als Pdf Datei usdrocke. Wer kei Internet het ond so en Zeddel wet, de chamer das säge ond ich werde das für en erledige. De Komedi.